

ملحمة التحرير
د. أحمد شوقي الفنجري
هدية إلى أبنائي وأحفادي
الذين عاشوا في الميدان
أثناء الثورة ضد الطغيان

صوت الشعب يبهدر هدر ثورة ثورة حتى النصر

لا للظلم ولا للقهر ثورة حتى طلوع الفجر

أحنا ثوار التحرير ثورة من أجل التغيير

شعلة نار وعزم ونور ضد الظلم والتزوير

يا ثوار يا ثوار ثورتنا نور من بعد النار

ثورتنا تبنى و تحمى الدار ثورتنا أمن و استقرار

بكره نهزم البطالة نلغى الفقر و نزيد العمال

نصلح خرابة و نشيل زباله و تبقى مصر فى أحسن حاله

نبنى المصانع جنب المصانع ونرجع المجد اللى ضايع

ونشجع كل بانى وزارع..... ونصدر للدنيا بضايع

وتمد إيدك فى إيد جارك نزرع محبة ونبارك

نتعاون ولا نعارك وربنا يوفق ويبارك

ثورة بالأجساد

يا أولادنا ويا بنات انتم جيل المعجزات
حققتوا ف أيام و ساعات اللى شقينا معاه سنوات

انتم عشتم فى التحرير ليل ونهار ووضلمه ونور
وجوع وبرد ومطربحور.... لكن بعزم يهد الزور

وبالجسد جنب الجسد أنشأتم أعظم سد
مليون مناضل متحد.... والملايكة معاهم مدد

وبالأجساد وبالإيمان ... من غير سلاح ولا طعان
زلزلتم عرش الطغيانه ... وانتصرتم ف الميدان

و الشعب عايش وياكم..... يسمع هتافكم ودعاكم
ويقول يا رب يحميكم و يسدد فى الحق خطاكم

والمستبد له يومه من الشعوب المظلومة
ومهما طال الصبر عليه ...نهايته قاسيه ومحتومه .

الشعب مهما كان صبور... ويبان أنه ساكت مقهور
ويوم ما ينفجر ويثور بركان وطوفان نار وبحور

الشباب

و يحارس على الأبواب.... شيوخ وأطفال مع الشباب
وبالأظافر والأنياب تحموا بيوتنا من الذئاب

وباللى شايلى المقشه.... تكنس تزيل حتى القشه
اصبح ميدان التحرير ورشه..... للأبطال بعد الدوشه

نبوس ايديك ياللى بتكنس.... وطول الليل واقف تحرس
وبالنهار تخطب و تحمس.... صوتك بيوصل بيت المقدس

مليون مظاهره ف التحرير من غير عنف و لا تدمير
والعالم كله مبهور و معجبون يروح التعمير

يقول فراعنا وأحفاد فراعنا... بنوا للعالم أعظم مبنى
واليوم بيبنوا أعظم منه ثورة كرامة بعد المحنة

مسلم وقطيبي

ايد محمد فى ايد حنا بكره بلدنا تعود جنه
ونصلح من احوالنا و نحقق كل آمالنا

ربك أنزل الأديان عشان تهذب الإنسان
منع اساءة أو عدوان ينشر محبة ف الأوطان

و العدو على الحدود .. له ف الداخل جاسوس و جنود
ينتظر اليوم الموعود.. يزرع فتنه و نار ووقود

و بقايا العهدالمطعون ,, اللي غلي ا لثورة حافدين
نهبوا شعبنا المسكين .. و ف الخفاء متربصين

وكل محنة تزيذنا إيمان وتقرب بين الإخوان
لا للطامع ولا الفتان ولا دخيل يشعل نيران

شهداء الثورة

يا شهداء إحنا معاكم أنتم سبقتوا واحنا وراكم
عهد الله ما ننساكم ونتبع كل خطاكم

الثورة دي ثورة بيضاء بلا سلاح ولا بغضاء
لكنهم سفكوا الدماء... وانكتبت بدم الشهداء

لازم نكمل المشوار عمل وإنتاج ليل ونهار
نزرع محبة ونطفي النار ونلغي العهد اللي غار

احنا بيكم نفتخر والدم مش حايروح هدر
ولو أقمنا تمثال حجر اسمكم في القلب انحفر

المرأة في الميدان

يا بناتنا ويا ستات يا زوجات وأمهات
مراسلات وصحفيات وكاتبات ومفكرات

منكم شهيدة وأم شهيد وأرملة وزوج مفقود
واللي عايشة على المحدود وتربي قادة وجنود

واللي بتكنس ف التحرير وفي إديها كفوف حرير
وهي دكتورة في الذرة..... وفي العلوم وفي التدبير

رفعتم راسنا ف العالم ووقفتم في وجه الظالم
أسود بتهدر وتقاوم.... وتصحّي الغافل النائم

تعظيم سلام للمناضلات المؤمنات الصابرات
المصلحات المكافحات ... جريئات ومخلصات

لازم نشوفكم في البرلمان بصوت قوي يهز الأركان
وتتبنوا حق المرأة حقوق مشروعة في القرآن

الجيش في الميدان

يا جيشنا يا حامى حمانا تحرس حدودنا و سمانا
احنا معاك وانت معنا نشعر بفضلك بامانا

تعظيم سلام للى يدافع عن الحدود سهران رادع
و يوم ما نحتاجه فى الشارع ... يقوم مع الشعب يصارع

قدم الثورة بمهاره ... حلّيتم مشاكل جباره
زى عبور سينا وبرليف تخططوا بإخلاص وجساره

وبعد ما تأدوا الرساله ... وتطهروا مصر من حثاله
ومن الفساد ومن العماله... وترجعوا بعز وبساله

الجيش و الشعب فى كل عصر ... خط واحد يحمى مصر
وانتصارات مالهاش حصر ... والتاريخ يكتب ويقر

من عهد خوفو و تحتمس ... من حطين و بيت المقدس
و المنصوره وسيناوبرليف ... و ايد ف ايد تحمى و تحرس

الجيش ولاؤه فقط للشعب ... لا للفرد ولا للحزب
وبيقسم أمام الرب ... يحمى الشعب بعزم و حب

الرئيس المعزول

يا ريس سابق معزول ...اليوم حساب حاسم وتقبل
عهدك فساد كله و تهويل ظلم ونهب مع التضليل

قلنا بطل ضربه جوية وله تقدير منا وتحية
نصبر عليه شوية شوية والصبر أصبح أبدية

وكنت عامل لنفسك صنم .صورك فوق كل القمم
وزى صدام اللي انعدم الصنم وقع و انهدم

ويا مبارك يا طيار منين ليك سبعين مليار
وتهربهم خارج الدار.....بقلب ميت واستهتار

والشعب واقف ف الطابور سنين طويله ساكت مقهور
خبزومسكن عمل وأجور..و مايجيش ابدأ عليه الدور

واحنا محناش ملك أبوك ... تورثنا لإبنك وأخوك
واللى حولك يضلوك تشاركهم ويشاركوك

أفسدتهم و أفسدوك ...دمرتهم و دمروك
ولوئتم كل ماضيكم ... والسجون ليكم مبروك

بعد اليوم مفيش ملكيه ... ومده محدوده دستوريه
رقابه شعبيه وقضائيه و محاسبه و مسئوليه

الصلاة في الميدان

الأذان يهز الميدان وتقشعر له الأبدان
ويزلزل عرش الطغيان... بدون سلاح ولا طعان

والشابة المسيحية تصب للمتوضين ميه
الله أكبر على الوطنية.... تجمع قلوب طاهرة ونقية

وخطبة جمعه ف المليون يسمعوا بخشوع وسكون
تكبيرهم يهز الكون ودعاءهم مجاب ومصون

واللي يصلوا في الميدان صفوف صفوف زي البنيان
كأنهم جيش يوم الطعان وسلاحهم حق وإيمان .

ورينا استجاب لدعاءكم وحقق كل مطالبكم
وقهر كل أعداءكم اللي اغتصبوا كل حقوقكم

الفن في الميدان

و يا فرق فن ومغنى مزمار وعود طبل ورنه
و أغاني تلهب أسماعنا..... الفن أقوى سلاح فى المحنه

الأغاني لازم تتغير عصر جديد نبني ونعمر
بعد الأهات والتذمر نتغنى بالنصر الأكبر

انتهى عصر الأهات والبكاء على اللي فات
والوقوف في الشرفات نندب ونشكو من الظلمات

بلاش نقول سهران الليل وبالحب مشغول وعليل
الوطن عاوز المسئول وبالعمل صاحي ومشغول

عاوزين نغني بحب مصر ونتكلم بلغة العصر
علم وإنتاج بكل فخر ... مصر عروسة والعمل مهر

الشرطة في الميدان

ويا شرطة صفحة جديدة ما ننساش ذكرى مجيدة
وتضحيات غير محدودة وتصلحوا أخطاء معدودة

الثورة دي مست الكل..... بركان ثائر هد الجبل
والشعب مد إيده بالأمل ونتصالح لأجل العمل

والسجان اليوم في السجن..... والبريئ فوق كل ظن
ونبتدي اليوم بالعمل..... لحماية أمن الوطن

الشرطة في خدمة الشعب.... شعار جميل مملوء بالحب
وخادم الناس سيدهم ومكانته تبقى في القلب

عاوزين معاملة حضارية عاوزين روح اسلامية
وتواضع وندية .. إنجاز وحزم وأخوية

والشعب يحفظ المعروف انتم ملاذنا يوم الخوف
أخوات وقرايب وضيوف لكم احترام ولكم تشريف

الصناعة

بأعمال يا صناعية عاوزين همة ومسئولية
عمل واتقان وجدية مواعيد دقيقة ولو بالثانية

مليون مظاهرة ف التحرير من غير عنف ولا تدمير
والعالم كله مبهور ومعجبين بروح التعمير

الله يبارك للمتقن واللي يبُدع ويتقن
واللي بيصدّق ويأمن واللي يراعي ربه ومؤمن

العمل صلاة وإيمان وبالاتقان نرضي الرحمن
سمعة بلدنا لازم تتصان ... بالبراعة وبالإحسان

الاضرابات الفئوية

ياللي بتضرب عن العمل... وتحث غيرك على الكسل
عاوز زيادة وعندك أمل ... وأنت بتوقف العجل

منين يجيلك رزق جديد وتطالب بمزيد ومزيد
والعمل واقف محدود.... تحت الضغط والتهديد

أصبر ليوم الميسرة ... واعمل بأقصى مقدرة
والحق يوصل مع المعذرة.... اليوم مفيش حقوق مهدرة

مش عاوزين اضرابات ولا مظاهرات ومزايدات
عاوزين عصر بناء وثبات ... واستقرار بدون هزات

الصوص

وبالصوص اللي خرجتم.... من السجون واتحررتم
بفعل فاعل لص ومجرم عاوز يخرب ويسمم

ولما داعي الجيش ناداكم ترجعوا كل اللي معاكم
دا مال وطن مجروح يناديكم ظهر مجيبون أشراف منكم

حتى اللصوص والحرامية..... عندهم روح وطنية
واحنا نسامح حسن النية ونخفف أحكام مدنية

عهد جديد جه يا جماعة ... بدون بطالة ولا صياغة
والرزق مكفول بالساعة بدون انحراف بل بقناعة

البلطجية

نداء نداء وألف نداء الي الشرطة الشرفاء
الي شباب مصر الأذكيااء وكل مصري له انتماء

اليوم أخطر من اللي فات والثورة عرضة للنكسات
متربصين لها بالمئات عاوزين يسرقو الإنجازات

احذروا من البلطجية....دعاة فتنة وفوضوية
اللي شايل سكين مخفية.... أو شعلة بارود نارية

واللي بيخفي وشه بقناع وصوته يخرق الأسماع
واللي يزايد في الأوضاع.... عاوز الوطن يفضل بضياع

ويندس بين الجماهير..... بين شباب مسالم وطهور
عاوز فتنة عاوز تدمير يلغي الثورة ويطفى النور

واللي ينهب الآثار والبيوت في ليل ونهار
واللي يروع التجار واللي يطلق علينا النار

اليوم أخطر من اللي فات عاوزين يقظة واحتياطات
والأمن له أولويات قبل الطعام والأقوات

استقرار بعد الثورة

ياللي تتادي بالتغيير والتغير بعد التغيير
وتخون كل حر كبير.... وتعطل ركب التعمير

مش عاوزين مزايدات ولا نهد كل اللي فات
فيه حسنات وسيئات.... بالعقل نحكم لا الشهوات

عاوزين تسامح وحسن نية.... عهد جديد وأخوية
الإنتاج عاوز وطنية فوق المطامع الشخصية

الإنتاج عاوز استقرار.... وجو هادئ للإعمار
بلا قلاقل ولا استنفار بل محبة وروح إيثار

البلد عاوزة الكفاءات وتخصص علمي وشهادات
والشريف له احترامات وللصوص سجن وغرامات

مش عاوزين نسبة أحزاب..... ولا وزارة من الدولار
عاوزين تخصص في كل باب ... ونفتح للعمل أبواب

الأحزاب والثورة

ويأساسة ويانواب مش عاوزين صراع أحزاب
عاوزين وحدة تسد الباب وتفتّح للعمل أبواب

الثورة قامت بدون حزبية ... ولا مطالب فنوية
ولا مطامع شخصية.... بل لله والوطنية

والثوار مش حزيين ولا عمال وفلاحين
ولا تجار عاوزين تموين.... ولا طوائف أو مغرضين

ثاروا لله وللبد ضد الفاسد والمستبد
وللإصلاح من غير هدد.....وللعادلة من غير حد

يا مسئولين عاوزين عفة... دا مال يتامي ف اللفة
ومال فقير عاوزه بلهفة ومال غلابى ف طابور واقفة

وخير بلدنا يكفّي الكل غني وفقير مولود أو كهل
إذا اشتغلنا بهمة وبذل والعدل في توزيع الدخل

حزب الشباب

يا شبابنا يا أبرار احموا مصر من الأشرار
اللي يسرق مكاسبكم واللي يزرع فتنة ونار

واللي عاوز يبعدكم عشان يوصل ويتحكم
مطلوب حزب جديد منكم..... والشعب وياكم وعاوزكم

ويبقى منكم النواب ... ومراقبين على الأحزاب
وعلى طهارة الثورة ويراعي يوم الحساب

المرحلة الجاية جهاد.... عاوز فطنة واستعداد
وتوصلوا صوت العباد ... وتبقوا واقفين بالمرصاد

يا مصر الله يحميكي... ويسدد في الحق خطاكي
ويوفق الكفو المخلص ويبعد الطامع الشاكي

السياح

يا سياح انتم فينا... انتم ضيوفنا و أهالينا
نفرش لكم رمله و زينه دا احنا عرب كرام يا أخونا

الأهرام هو وأبو الهول ... و النيل و التماثيل بتقول
علم وحضاره و فن وأصيل و الإنسانية تفف فى زهول

الأزهر والقلعه تتورّ ... ومساجد وكنائس تكبر
ومتاحف بالمجد تعيرّ و مراكب تبحر و بتسهر

والأعظم ميدان التحرير أصبح مزار سياحي خطير
وكل شبر فيه له دور وذكريات عظمى وتقدير

احنا أحفاد الفراعنه... و المجد دا كله بتاعنا
نحميه بروحنا و دراعنا.... و اللى يمسه يروعنا

يا مصر يا أرض الأمجاد ... من الفراعنه للأحفاد
و كم قهرت من الحساد و انتصاراتك لنا أعياد

الثورة دي عاوزه أقلام تكتب تاريخها للحكام
وللشعوب اللى بتتام ... وتعيش فى كهف النسيان

حوض النيل

يا دول حوض النيل..... شريان حياة مصر الأصيل
وبالقانون حقنا مكفول ... واحذروا بينا الدخيل

ومصر أولى بالصدقة النيل يبني أحسن علاقة
نبني حضارة سباقه من غير عداوة ولا إعاقة

ويا مصر لابد من تغيير..... والصناعة لغة التطوير
ومن مجتمع زراعي فقير... لابد من صناعة وتصدير

ولابد من ثورة تعليم..... ونبني صرح صناعي عظيم
ونعلم شبابنا الحرفة ... والابتكارات والتصميم

من الإبرة للطيارة... والقطار والسيارة
والتكنولوجيا الجبارة بكل دقة ومهارة

بالصناعة قامت أمم..... بنت حضارة من العدم
واعتلوا أعلى القمم والفقير عندهم انعدم

مبروك يا مصر الديمقراطية ... والحرية السياسية
والحقوق الانسانية..... وا لكرامة الشخصية

مصر غنية بالكفاءات والعبرات والقيادات
استبعدوا في العهد اللي فات ... لأنهم أشرف وثقات

واليوم في ظل الحرية... والعدل والديمقراطية
تتطلق كل المواهب وتبقى مصر دولة غنية

وكل موهوب وله مجال.... خبرة وعلم وعمل فعال
واللي يشكو من الإهمال.... اليوم فوق الرؤوس بتشال

ما عاش اللي يعيش وحده.... واللي يعمل بس لمجده
واللي يشوف محتاج ويصده... واللي يبخل علينا بجهد

وربنا يجازي المجتهد.... اللي يعمل لله والبلد
من غير مطامع شخصية... نضع ونبني ونجتهد

يا رجال مصر الحكماء.... ويا علماءنا النبغاء
و
ويا رجال اعمال شرفلء ...ويا شبابنا النبهاء

يا رجاله ويا ستات مسلمين.أقباط وفنئات
وحتى الأطفال فى الحضاناتأو كهول بالعكازات

مصر محتاجة للكل وكل مصرى وله عمل
تعمل و تعمل بلا ملل ونصلح أى خلل

عاوزين تعاون وإنكار ذات ونوجد كل الطاقات
و الكل يعمل بجد وسكات ونتسابق فى الخيرات

الكبير يحمى الصغير و الغنى يحمى الفقير
لا مظلوم و لا مقهور و نتعاطف بقلب كبير

بالأخلاق قامت أمم بنوا حضاره من العدم
و احنا حضاره من القدم لازم نوصل أعلى القمم

و تبقى مصر دوله غنيه بالثروه الإنسانيه
و بالثروه القومييه و بالأخلاق المثاليه

و لما نكتب صنع بمصر الدنيا تقبل بكل فخر
عمل متقن و مبتكر و يسابق روح العصر